



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАР

2017 жылғы 18 қазан

Төрт екінші деңгейдегі банктің Банк секторының қаржылық орнықтылығын арттыру бағдарламасына қатысуы мақұлданды

Ұлттық Банк басшысы Д. Ақышев «2018-2020 жылдарға арналған республикалық бюджет туралы» Заң жобасын таныстыру бойынша Парламент Мәжілісі отырысының қорытындысы бойынша журналистердің сұрақтарына жауап бере отырып, Банк секторының қаржылық орнықтылығын арттыру бағдарламасын іске асыру барысы туралы хабарлады.

Д. Ақышев Бағдарламаны іске асыру шеңберінде ағымдағы жылғы қыркүйекте және қазанда Ұлттық Банк Басқармасының төрт екінші деңгейдегі банктің: «АТФ Банк» АҚ-тың, «Еуразиялық банк» АҚ-тың, «Цеснабанк» АҚ-тың және «Банк ЦентрКредит» АҚ-тың 410 миллиард теңге жалпы сомаға Бағдарламаға қатысуын мақұлдағанын хабарлады. «Аталған банктер және олардың ірі акционерлері қаржылық орнықтылықты арттыру, активтердің сапасын жақсарту және жұмыс істемейтін кредиттердің деңгейін төмендету жөніндегі іс-шаралар жоспарларын, сондай-ақ банкті үстеме капиталдандыру бойынша жазбаша міндеттемелер ұсынды», - деді Д. Ақышев.

Бұл ретте ол банктердің қаржылық орнықтылығын арттыру жөніндегі іс-шаралар жоспарлары белгіленген тәртіппен Ұлттық Банкпен келісілгеннен кейін Ұлттық Банктің еншілес ұйымы – «Қазақстанның орнықтылық қоры» АҚ аталған банктердің реттелген облигацияларын сатып алатынын нақтылады.

Қаржы реттеушісінің басшысы сондай-ақ басқа банктердің бағдарламаға қатысуға өтінімдері банктердің қаржылық модельдерін келіскеннен кейін және банктердің басшылығы мен акционерлері Ұлттық Банктің талаптарын орындағаннан кейін Ұлттық Банк Басқармасының қарауына шығарылатынын хабарлады.

Мемлекет басшысының Қазақстан халқына Жолдауының шеңберінде айтылған тапсырмасын орындау мақсатында Ұлттық Банктің Қазақстан Республикасының банк секторының қаржылық орнықтылығын арттыру бағдарламасын әзірлегенін, қабылдағанын және қазіргі уақытта іске асырып жатқанын еске саламыз. Бағдарламада банк секторының қаржылық орнықтылығын қамтамасыз ету бойынша үш бағыт көзделді: (1) қадағалап реттеудің сапасын және жеделдігін арттыру үшін реттеуші және қадағалаушы ортаны өзгерту; (2) жүйе құраушы банктің қаржылық орнықтылығын арттыру; (3) ірі банктердің қаржылық орнықтылығын арттыру. Бағдарлама мемлекеттік қаражаттың ақылы, мерзімді және қайтарымды болу қағидаттарына негізделген және акционерлердің банктерді үстеме капиталдандыру жөніндегі ортақ жауапкершілігін көздейді.

Анықтама үшін: екінші деңгейдегі банктердің Бағдарламаға қатысуы туралы сұрақтар туындаған жағдайда, Сіз оларды Ұлттық Банктің Facebook-тегі «ҚР Ұлттық Банкі хабарлайды, түсіндіреді, түсініктеме береді» бетінде және Ұлттық Банктің «ҚҰБ Онлайн» мобильді қосымшасы арқылы қоя аласыздар.

Толығырақ ақпаратты мына телефон бойынша алуға болады
+7 (727) 270 45 85
press@nationalbank.kz
www.nationalbank.kz